



### EDITORIAL

## Mabayanihon nga makigbisog kontra ha rehimen US-Duterte

**G**inseselebrar yana han katawhan Pilipino an ika-48 nga anibersaryo han National Democratic Front of the Philippines, an sikreto ngan pinakakonsolidado nga organisasyon han mga rebolusyunaryo nga pwersa nga nakikigbisog para ha tinuod nga demokrasya ngan katalwasan. Hini nga okasyon, gin-aayat an ngatanan nga rebolusyunaryo nga butkon an katawhan agud mabayanihon nga atuhan ngan patalsikon hi Duterte.

An presente nga armado nga rebolusyon han katawhan Pilipino pagpadayon han 500 katuig nga pakig-away kontra ha mga langyaw nga mananakop, nga nagtikang han pakyason ni Datu Lapulapu an pananakop han mga kolonyalista nga Espanyol. Ginpadayon naman ini han Rebolusyon 1986 ngan ha Gerra nga Pilipino-Amerikano, diin lumandaw an aragway ha Balangiga ngan Catubig nga nagdaug tungod ha superyor nga taktika ngan kolektibo nga paggios han mga gerilya nga Pilipino kontra ha mga Amerikano nga mananakop.

Nagpapadayon ini ngan gin-isa pa ha mas hitaas nga balitang ha pamumuno han Partido Komunista ng Pilipinas ngan pinaagi han demokratiko nga rebolusyon han katawhan nga mayda sosyalista nga perspektiba.

Ini nga rebolusyunaryo nga kaysaysayan makikit-an ha presente nga pag-ato han katawhan ha pinakama-raot nga halimaw nga gin-anak han dunot nga sistema: an rehimen Duterte. Ha kabaryuhan, nagpapadayon an pag-ato han katawhan ha todo-gerra han panmatay, panarhug, pagpasu-render, ngan waray wantas nga pagmalgastar han pondo han katawhan para ha mga waray pulos nga operasyon ngan higamit militar. Ha kasyudaran, maisog nga nakikigbisog an katawhan ha ganggang han irong han kaaway, agud kolektibo nga ig-insister an ira mga katungod. Ha bug-os nga nasud, nasarig an katawhan ha ira kalugaringon agud magburublig atubangan han kawaray pulos han guberno. Mabayanihon nira nga ginpapakyas an brutal nga panmuypoy ha

## Abril 27, gindeklara nga Adlaw han Armado nga Kagitingan

GINDEKLARA HAN PARTIDO Komunista ng Pilipinas an Abril 27 komo "Adlaw han Armado nga Kagitingan," komo pagsalin-urog han ika-500 katuig nga anibersaryo han Aragway ha Mactan nga amo an "syahan nga organisado nga pag-ato han mga Pilipino kontra ha langyaw nga mananakop."

Nanawagan an Partido ha ngatanan nga yunit han BHB nga magpormasyon ha aga hiton nga petsa ngan saludaran ini nga makasaysayan nga adlaw, ngan padig-unon an ira determinasyon nga igpadayon an armado nga pakig-away para ha nasyunal nga katalwasan.

Hadton Abril 27, 1521, ginperdi han 1,500 nga mangaraway ha pangunguna ni Datu Lapulapu an mga Espanyol ha Mactan, Cebu. Tuyo han mga langyaw ginpangunahan ni Ferdinand Magellan nga sumakop han bag-o nga teritoryo ha ngaran han Espansya. Ginamit hira Lapulapu han superyor nga pwersa ngan kahibaruhan han tereyn agud himuon nga waray pulos an magbakod nga armas han mga mananakop ngan pakyason an pag-atake hini.

Mababasa an kumpleto nga artikulo hiunong ha makasaysayan nga aragway ha Mactan ha isyu han Ang Bayan, Abril 21, 2021.

## Operasyon han 20th IB ha Las Navas, dirudiretso

HAROS USA KAKUMPANYA han mga tropa han 20th Infantry Battalion an dirudiretso nga naghihimo han magkadungan nga clearing operation ngan Retooled Community Support Program (RCSP) ha lima nga baryo ha Las Navas, Northern Samar.

## Anibersaryo han BHB, ginselebrar ha butnga han FMO

Ginselebrar han mga Pula nga mangaraway ngan masa nga parag-uma an ika-52 nga anibersaryo han Bagong Hukbong Bayan ha usa nga prente gerilya ha Northern Samar nga ginlalansaran yana han nakapokus nga operasyon militar o FMO.

Ha sumat han BHB-Rodante Urtal Command, ginhimo han yunit han BHB an selebrasyon mismo ha adlaw han Marso 29 ngan gintambungan han taghimaryo tikang ha lima nga baryo. Waray pakasabot an kaaway han balita han ira aktibidad.


Nagin higayon an programa agud usahon an masa kabahin ha sitwasyon militar ha prubinsya, nga pokus yana han FMO ngan hiluagan nga Re-tooled Community Support Program (RCSP.) Gin-urusa liwat hira ha mga panawagan nga atubangon an pangatake han kaaway ngan ha panginahanglan para ha madig-on nga pamumuno han Partido. Ginpasaro liwat an mga pamaagi kun tiunan-o papakyason han taghimaryo an RCSP ngan an programa nga pagpasurender nga E-CLIP.

Padayon an panalinguha han BHB

nga isahon an mapan-ato nga diwa han masa. Kahuman han anibersaryo, nakapanhatag hira han 10,500 nga kopya han polyeto ngadto ha walo nga baryo. Ginpanawagan didi an pag-api han kabatan-unan ha hukbo ngan pagpasulong han rebolusyon komo solusyon ha kakurian.

Ini nga selebrasyon usa la ha diri mamenos ha tulo nga selebrasyon han magkalain-lain nga yunit han BHB ha Northern Samar. Ha usa nga prente gerilya, ginpalutaw ha salog han usa nga yunit han BHB an ira mga panawagan han pagselebrar ha anibersaryo. Kabulig an mga batan-on ha lokalidad, ginpaskil liwat nira an mga panawagan ha mga base han BHB, hagna, ngan ligid han haywey.

Nagkamayda liwat han selebrasyon ha parte han Eastern Samar nga ginlalansaran liwat han FMO. ■



### HA KAMATUORAN

## Mga peace rally, gidaan nga taktika ha saywar han 8th ID!

Baga hin mga ligbos nga binutho an dorudosena nga kontra-komunista nga "peace rally" hadton anibersaryo han BHB hadton Marso 29. Kundi **mapan-uwat ini nga mga katitirok**, nga gidaan nga taktika ha saywar han 8th Infantry Division agud ipagawas nga ginsusuportahan han katawhan an ira kampanya kontra-insurhensiya, sigon ha National Democratic Front-Eastern Visayas.

Ginbalita han NDF-EV an pag-uwat han 8th ID ha mga **upisyal han barangay ha Catubig ngan Las Navas** nga tumambong hini nga katitirok. Ginpirit pa hira nga pakarauton an PKP-BHB-NDF. Kun dumiri hira, kakasuhan hira han pagtalapas ha Anti-Terror Law. Una na nga gin-uwat han militar an mga residente han Catubig nga kumuha kuno han *relief* kundi "peace rally" ngay-an an ira aabutan.

"Mabayanihon...", tikang ha paypay 1

ngatanan nga oposisyon.

Ginpapadayon han katawhan an pag-ato ha pananakop han imperyalismo nga China ngan panginginlabot han imperyalismo nga US. Natikahiluag an pagkakaurusa han mga nananawagan para ha tinuod nga katalwasan. Naku-kumbinser bisan an konserbatibo nga oposisyon ngan makanasud nga elemento ha militar ngan kapulisan nga kinahanglan patalsikon an niyutiyo nga hi Duterte.

Ha pagpadayon hini pakigbisog, angay balikan han ngatanan nga rebolusyunaryo an baul-karikuhan han rebolusyunaryo nga kasaysayan han nasud Pilipinas. Magseserbe ini nga inspirasyon ha pinakakadagmitan nga buruhaton hini nga usahon an pinakahiluag nga masa ha pagpatalsik ha waray pulos, pakuri ngan traydor nga hi Duterte. ■

"Operasyon...", tikang ha paypay 1

Ha report han BHB-Rodante Urtal Command hadin Abril, 73 nga tropa han Alpha Company han 20th IB an naghihimo han operasyon nga RCSP ha Sag-od, Epaw, San Jose, Tagan-ayan, ngan Sitio Inuman ha Tagabiran. Usa nga Sgt. Raniel E. Cofuentes an nangunguna ha operasyon ha Brgy. Epaw.

Naghihimo liwat an 20th IB han tulo kahugna han *clearing operations* antes ngan samtang ginhihimo an operasyon nga RCSP. Padayon ini nga mga tinagdamo ngan magastos nga operasyon han kaaway, luyo han krisis ha ekonomiya ngan kawaray ayuda para ha kablason.

An mga operasyon sa Las Navas kaparte han hiluagan nga RCSP ha 9 nga bungto ha Northern Samar. ■